

Ե .

Ա՛յ իմ աննըման նըման, մայրըն չէ բերեր քեզ նըման.
Աչերդ է ի ծով նըման, եւ ունբերդ ի թեւ ծիծըռնկան.
Այդ քու աչերուդ շալֆուն մէկ ամպ էր Սօլքատ խորասան.
Ունբերդ է կապեր կամար ու կ'երթայ ի Մըսրըն թալան,
Շատ ու շատ գերի արեր, շատ խօճայ ու շատ պագըրկան:

Զ .

Դեղներ եմ խընկիդ նըման ու առեր եմ գոյն գաֆարան:
Զգիտեմ թէ քո սէ՞րդ արեր թէ եկեր է օրըս մահուան:

Է .

Վաղվընէ քնից վեր ելայ, թէ երթամ յիմ եարն ի բարեւ,
Խօյ եարս ալ իմ դեմս ելաւ, իւր երեսն էր վարդ ու տերեւ.
Վարդ ալ խօշ լեզեր ունի՝ վեղվէնէքն երբ դըպչի արեւ,
Յանէ գիւր կանանչ կապան, լուկ հագնի գկարմիրն ի վերեւ:

Ը .

Ձայդ պագդ որի քո բերնէն դու տըւիր քո սըրտի կամով,
Յանցեղ անուշիկ պըտուղ ո՛չ ցամաք կար եւ ո՛չ ի ծով.
Նըման էր այն պըտըղոյն որ Ադամ կերաւ խաբանօք,
Կերաւ՝ ի դրախտէն ելաւ, ես ի քո ծոցոյն կարօտով:

Թ .

Ձիմ եարն ի գընալ տեսայ որ կ'երթար ի ճամբադ ի վար.
Մանտըր քայլափոխ կ'առնէր, կու քաղէր ծաղիկ նունուֆար.
Ամէն հանգչելու տեղիկ երեսին չըներ ու կուլար.
Կուրնա՛ր չարկըմնուն աչուին, որ պահէն քեզ յիսնէ օտար:

Ժ .

Սըրտիկս է խալկին եղեր, զօրն ըզքո դուսան կու եփէ.
Անձիկս է փայտ եղեր ու գկըրակն ի վառ կու պահէ:
Տեսեր եմ որ միսն եփի՝ նա ըզկրա՛կըն դադրեցունէ.
Թողեր միսըն գիւր ոսկորն, դեռ ի կրա՛կըն փայտ կու ձըզէ:

Ժ Ա .

Դու ո՞վ ես՝ յերդիկդ ելեր զայդ օտար հողըդ կու կոխես.
Թէ վարդ ես նէ՝ վար եկո՛, թէ օտար ծաղիկ նա գընա՛: